

سفر نهائي

أنا مسافر بكرة وحدية
في مواصلات رايحة مش جاية
معايا مرسيدس وفيراري
من أصحابي منحة وهدية
لأنفاخر وسط الأموات
وأحلملي بكام أمنية
وقصر متركبله عجالات
وسرير ووسادة وهورية
وساعة روليكس سويسري
بألماس والذهب مطلية
ودوا مقاوم للدود
يحمي عظامي واللحمية
سألت صحابي يرافقوني
ولا واحد رد عليا

كله من سفري مرعوب
دا قطر محجوز ليكم وليا
وقاعد تحصي عمارات
حتنزل المحطة الجاية
كراسيه مبتعرفشي الدرجات
إلا بالإخلاص وحسن النية
وتذاكر سفرك أعمالك
مكتوبة عليك وعليا.

ابني حمادة

فكرتني بسنين عمري
وكنت مشغول وناسي
يوم ما جه عمك وخالك
وقالولي يا سعد حالك
بعد البنات جاتلك رجالك
دا سند ليك ويرتاح بالك
بكرة يكبر يكون زينة المجالس